

## **ODLUKA**

**O PRIHVATANJU ZADUŽENJA PO SPORAZUMU O FINANSIRANJU  
IZMEĐU BOSNE I HERCEGOVINE I SVJETSKE BANKE -  
MEĐUNARODNE ASOCIJACIJE ZA RAZVOJ (IDA) ZA REALIZACIJU  
PROJEKTA HITNOG OPORAVKA OD POPLAVA U BOSNI I  
HERCEGOVINI**

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Parlament Federacije Bosne i Hercegovine je na sjednici Predstavničkog doma, održanoj 26. lipnja 2014. godine, i na sjednici Doma naroda, održanoj 30. lipnja 2014. godine, d o n i o

## ODLUKU

### **O PRIHVATANJU ZADUŽENJA PO SPORAZUMU O FINANSIRANJU IZMEĐU BOSNE I HERCEGOVINE I SVJETSKE BANKE - MEĐUNARODNE ASOCIJACIJE ZA RAZVOJ (IDA) ZA REALIZACIJU PROJEKTA HITNOG OPORAVKA OD POPLAVA U BOSNI I HERCEGOVINI**

#### I.

Prihvata se zaduženje Federacije Bosne i Hercegovine (u daljnjem tekstu: Federacija) po Sporazumu o finansiranju (u daljnjem tekstu: Sporazum) između Bosne i Hercegovine (u daljnjem tekstu: BiH) i Svjetske banke - Međunarodne asocijacije za razvoj (u daljnjem tekstu: IDA) u iznosu do 30.875.000,00 SDR (ekvivalent 47.500.000,00 USD), što iznosi 47,5% od ukupno odobrenih sredstava za Bosnu i Hercegovinu koja iznose 65.000.000,00 SDR (ekvivalent 100.000.000,00 USD).

#### II.

Sredstva Sporazuma iz tačke I. ove odluke koristit će se za finansiranje Projekta hitnog oporavka od poplava u BiH. Primarni cilj Projekta je nabavka roba hitno potrebnih tokom faze oporavka (logistička roba, roba za rekonstrukciju, roba za sektor energetike i električne energije, kao i roba za oporavak poljoprivrede pri čemu su kao početni prioriteti određeni gorivo i hrana, poljoprivredna roba), rehabilitacija strateške regionalne javne infrastrukture kao što su transportne veze, distributivna i prijenosna infrastruktura, nasipi i druga strateška javna infrastruktura, rehabilitacija lokalne infrastrukture kao što su vodovodi, lokalne ceste i mostovi itd. i podrška za implementaciju projekta i izgradnju kapaciteta.

#### III.

Sredstva Sporazuma iz tačke I. ove odluke odobravaju se Federaciji pod sljedećim uvjetima:

- rok otplate.....25 godina
- grace period.....5 godina
- servisni troškovi.....0,75% godišnje
- kamatna stopa.....1,25% godišnje
- dospijeća.....polugodišnja
- datumi plaćanja glavnice i kamata .....15. februara i 15. augusta svake godine.

#### IV.

Potvrđuje se da je razmatrana dokumentacija prihvatljiva za Federaciju a posebno:

- usaglašen zapisnik s pregovora;
- Sporazum o finansiranju između Bosne i Hercegovine i IDA-e;
- Federalni projektni sporazum zaključen između Međunarodne asocijacije za razvoj i Federacije Bosne i Hercegovine;
- Dokument o procjeni Projekta hitnog oporavka od poplava u Bosne i Hercegovine (PAD).

#### V.

U periodu implementacije Projekta u budžetu Federacije nije potrebno osigurati dodatna finansijska sredstva za sufinansiranje Projekta.

#### VI.

Daje se saglasnost za zaključivanje Supsidijarnog sporazuma o zajmu između BiH i Federacije za sredstva iz tačke I. ove odluke.

Za potpisivanje Supsidijarnog sporazuma ovlašćuje se federalni ministar finansija.

#### VII.

Za realizaciju ove odluke i izvještavanje zadužuju se Federalno ministarstvo finansija i Jedinica za implementaciju projekta (PIU), formirana pri Federalnom ministarstvu poljoprivrede, vodoprivrede i šumarstva, svako u okviru svoje nadležnosti.

#### VIII.

Implementacija Sporazuma iz tačke I. ove odluke ne zahtijeva donošenje novih ili izmjenu postojećih zakona.

#### IX.

Ova odluka stupa na snagu narednog dana od dana objavljivanja u "Službenim novinama Federacije BiH".

PF broj: 01,02-02-813/14  
30. juna 2014. godine  
S a r a j e v o

**PREDSJEDAVALJUĆI  
DOMA NARODA  
PARLAMENTA FEDERACIJE BIH**

Tomislav Martinović

**PREDSJEDAVALJUĆI  
PREDSTAVNIČKOG DOMA  
PARLAMENTA FEDERACIJE BIH**

Safet Softić